

壬子置別宮分承政院時冊禮隔日而分院之設未有可據前例政院啓稟上以冊妃後親迎前日子尚遠命差送○憲府論黃海監司李世翊雖有吏才名望素輕請遞差不從○開城府地震○夜巽方艮方有氣如火光○五月朔癸丑因政院啓稟命新除大小官並肅拜別宮○下旨求言于在外儒臣別遣史官傳諭于領中樞宋時烈從政院之請也○咸鏡道北青童子趙文昌擊鉦訴冤下刑曹問啓供云其祖父尚貧以非罪被誣於同府居金奉先受刑而死其父惟寬其叔父惟孟痛其父冤死擊殺奉先即自告官就法監司收舉啓聞刑曹擬以謀殺人之律先王特命減死其叔父配南海得土疾而死其父配巨濟亦以土疾垂死渠以遺腹子年今十七不識父面其祖母年過八十只祖孫二人相依為命而許令往尋其父存歿故來到都下適聞有憫旱䟽決之舉敢訴痛迫之情上憐之特命放惟寬之配○初持平金鎮龜以朴泰尚事引避也沈壽亮林泳吳道一宋光淵在玉堂以為泰尚於元禎特罷之時啓請還收者固有其失而至於臺諫不可拿鞠之言則不無所見惟此一欵鎮龜所論亦過也乃以此請遞左相閔鼎重大以為非壽亮等不自安久不行公至是始出泰尚族弟泰遜嘗與鎮龜從叔萬塚同為諫官劾萬塚之舅重林察訪金世